

22. maj 2016

Inatsisartut suleriaasiat § 36 naapertorlugu apeqquteqaat aallaavigalugu oqallisissiaq matumuuna imaattoq matumuuna saqqummiuppara.

Meeqqat peqqissumik imaqarluartumillu inerikkiartornissaannut, atualernissamut piareersimanissaannut nalinginnaasumillu perorsarsimassusaannut iluaqutaasussamik nunatsinni meeqqanut suli atualinngitsunut perorsaanikkut inerikkiartuutaasumik ilaqtariit meerartallit nuna tamakkerlugu atuinissamut piarerfissaqalernissaat qanoq qulakkeerneqarsinnaaner-soq pillugu apeqquteqaat aallaavigalugu oqallisissiatut siunnersuut.

(Inatsisartunut ilaasortaq Hans Enoksen, Partii Naleraq)

Inatsisartunut ilaasortap Hans Enoksen, Partii Naleraq Inatsisartut § 36 naapertorlugu apeqquteqaat aallaavigalugu oqallisissiaanut ima Siumumiit oqaaseqassaagut.

Tamatta nunatsinni naligiinnerusumik atugassaqarluta ineriartornissaq orniginarteqaarput, aamma taamaappoq ilaqtariit meerartallit eqqarsaatigalugit nunatsinni meeqqanut suli atualinngitsunut perorsaanikkut inerikkiartuutaasumik neqerooruteqartarneq eqqarsaatigalugu.

Taamaakkaluortoq Naalakkersuisut akissuteqaatiminni tunngavilersuutigisaat aamma paasilluarparput, tassa meeqqanut suli atualinngitsunut ulluunerani neqeroorutininik pisariaqartinneqartuninik peqarnissaq aammattaaq taakkununga meeqquerivinnik paaqqinnittarfeqarnissaq Kommunit akisussaaffigaa.

Taamak oqaaseqarlunga, naak nunatsinni pineqartoq Kommunit oqartussaaffiisa ataaniikkaluortoq nalunngilarput atugassarititaasut assigiinngitsuusut, soorluttaaq aamma atuisunit akiliutigineqartartut Kommunit imminneq aalajangersaavigisaraat.

Nunatsinni perorsaanermik ilinniagaqarsimasut amigaataapput, qujanartumilli ajornartorsiut anigorniarlugu nunagisaq qimannagu perorsasunnngorniarsinnaaneq aallartinneqarsimavoq. Oqallinnerli tamakkiinerusoq pilersissagaanni Siumumiit isumaqarpugut tamakku aamma tikiqqartariaqartut.

Meerartatta pitsaasunik atugaqarlutik ineriartornissaat pingaarteqaarput pingaartitariuassallutigulu, taakuuppummi inuiaqatigiinni nangitsisussat. Ilinniarsimassutsip qaffassartuarnissaa sunut tamanut tunngaviuvoq avataaniillu ikiorneqarnissamik pisariaqartitsinerup tamatigit siunnerfitsinni appasinnerpaaffisaminiitinnissaa peroriartornermi pitsaasunik inerikkiartuutaasumillu periarfissaqarnerup pitsaasumik qularnaarsimaneqartariaqarnerata tunngavigilluinnarpaa.

Naak apeqquteqaat aallaavigalugu oqallissaarummik saqqummiussaqaartup sumiiffiit isorliunerusut sumiiffinnit inuttunerusunit assigiimmik periarfissaqarnissaat ujartuiffigigaa eqqaarusunnarpoq sumiiffinni inuttunerusuni tamanna aamma ajornartorsiutaammat perorsasunik naammattunik peqannginnitsinnik tunngavilimmik. Taamaammat apererusunnarpoq perorsasunut atugassarititaasut akissaasersugaanerallu ilumut ullutsinnut naapertuunnersut.

Perorsasut atugaat tupinnanngitsumik eqqartorneqartuartarput, meerartatsinnut pingaarteqisatsinnut akisussaaffik annertoq perorsasunut sulisinnaaqqulluta tunniuttarparput, sumiiffippasuaruilu ajornartorsiutaavoq paaqqinnittarfiit perorsasunik naammattunik inuttalernissaat.

Apequteqaat aallaavigalugu siunnersuuteqartumut qujalluta oqalliluarnissamik Siumumiit kissaas-
sivugut.

Vivian Motzfeldt
Siumut